

**Date – 05/03/2026**

**Time - 18:30 -18:40Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES ( EVENING )**

1. Mizoram sorkarin Sawhthing hralh hun a kalpui mekah, SCC 10 atangin sawhthing quintal 5,887 hralh a ni tawh.
2. MNF Party Thalain Minister Dr Vanlalhlana bang tura an phutna chu ZPM chuan chhangan, Minister hian dan bawhchhiat a nei lo an ti.
3. India leh Finland chuan vawiin khan inremna thuthlung engemawzat an ziak
4. Bihar Chief Minister leh JD(U) President Nitish Kumar chuan Rajya Sabha inthlan chuh turin vawiin khan a hming a thehltut.



**GINGER**

Mizoram sorkarin Sawhthing hralh hun a kalpui mekah, Secondary Collection Centre (SCC) 10 atangin sawhthing quintal 5,887 hralh a ni tawh.

Thla hlui February ni 2 atanga support price awma kut hnathawktuten sawhthing an hralh theih hun chung tura a ruahman kal mekah tun thla ni 3 thleng khan SCC 10 atangin sawhthing cheng nuai 187.49 man hralh niin, sorkarin support price a pek tur nen chuan a vaiin cheng nuai 294.35 man a ni.

Mizoram Agriculture Marketing Board (MAMB) hotute hnen atanga Akashvani Aizawl thudawn danin, sawhthing hralhna hmun tur bika ruahman SCC 64 zinga SCC 10-ah sumdawngten kut hnathawktute sawhthing an lei tawh a, heng SCC 64-a sawhthing awm zat tura tarlan chu quintal nuai 3 sing 4 & 6,470 niin, tuna sumdawngten an lei tawh zat hi a vaiin quintal 5,887 a ni.

MAMB-in support price awma sawhthing hralh theih hun tura a bituk chu February 2 - May 30 thleng a ni a; February 2 atanga tun thla ni 3 thleng khan SCC 10-ah hian kut hnathawktuten sawhthing sumdawngten an lei hi cheng nuai 187.49 man niin, sorkarin ba awm loa lei tura sumdawngte a tih angin sumdawngte hian an sawhthing leina man hi kut hnathawktute hnenah an pe vek tawh a; heng SCC 10-ah hian sumdawngte hian sawhthing hi kg khat cheng 30 atanga cheng 35 inkarin an lei a ni.

Sorkarin support price a pek tur hi sawhthing hralh zawh huna pek chhuah tur niin, support price an la hmuh tur hi cheng nuai 106,86 a ni a; tuna sumdawngte

hnen atanga sawhthing hralhna an hmuh tawh leh sorkar atanga kut hnathawktuten support price an hmuh tur hi belhkhawmin cheng nuai 294.35 a tling tawh a ni.



## **MZP-ZORAM NI**

MZP General Headquarters, Aizawl chuan vawiin khan MZP Conference Hall-ah "Zoram Ni" an hmang a,

MZP President Dr. C. Lalremruata chuan, "India in Jet Fighter hmanga Mizoram a beihna champha March Ni 5 chu MZP chuan kum 2008 atang khan a serh tawh thin a, India huatna ni emaw, hel tumna rilru chawh thawh tumna lam a nilo a ti a, ram tana nunna hlantute leh hliam te chawimawina leh zahna an hlan nawn leh a, he ni hi hnam inpumkhatna ni atan, hliam hlui te dam se hmalam pan na ni atan ti a hman a ni a ti.

MZP President chuan, tunhnaia Mizoram Legislative Assembly in dan "The Mizo Marriage and Inheritance of Property (Amendment) Act, 2026" a siam chu kil hrang hrang atanga sawi a tam hle a. He dan hi MZP chuan tha a ti a, a thlawp a ti a.

MZP chuan hun engemaw chen kalta atang khan hnam kal zel tur thlirin Hnamdang Nupui/Pasal-a neilo tura inzirtirna ni an lo hmang tawh thin a. Zirlai tam takin hnamdang nupui pasal-a neilo turin thutiam an lo nei tawh a ni a ti.

"I ram leh hnam humhalh la, khawvelin a dem lovang che" tih thupui hmangin, Prof. JV Hluna leh Pu F. Vanlalrochana, MPS te n he hunah hian thu an sawi a ni.

BJP Mizoram chuan MZP te'n Mizoram History-a hun hreawm leh thim lai ber hriatrengna atana, 'ZORAM NI' an phuah chu an tawmpui a, Mizoram mipuite'n hetiang hun an tawh lai an theihngihl mai loh nan leh hriatrengna "ZORAM NI" an buatsaih chu a lawmawm an tih thu vawiin khan thuchhuah siamin an sawi a ni.

BJP Mizoram chuan March ni 5, Kum 1966 Congress Sorkar Indira Gandhi kaihhruiin, a ram chung mi, Mizoram nasa taka Jet Fighter hmanga a beih leh Mizoram hmun hrang hrang ah bomb te thlak a, paw sawi lo mi tam tak tawrhna a thlen kha an theihngihl ngai dawn lo an ti a ni.



## **DR VANLALTHLANA ISSUE**

MNF Party Thalain Minister Dr Vanlalhlana bang tura an phutna chu ZPM chuan chhangin, Minister hian dan bawhchhiat a nei lo an ti.

MNF Thalain vawiina Aizawl Vanapa Hall kawta pungkawm chuan Education Minister Dr. Vanlalhlana chu a dept chan te hneh lo leh thildiklo ti a puhin bang turin an phut a, Minister chu a awmna party ZPM MLA Chairman-na hnuaiia Assembly Petitions Committee-in Restricted Tender hmanga contractor a thlan dan chu Eirukna lian tak leh dik lo tak a ni tih a finfiah a, cancel an phut angin sorkarin an cancel sak a ni an ti a, a MLA puite pawhin thup ngaihna awm miah loa a thilsual tih cancel leh ngei an phut hi cheng cheng vbc 22 leh nuai 48 chuang a ni an ti a.

Mizoram State University Bill 2025 Assembly a sawiho lain NEP 2020 angin Lungleiah Mizoram State University a dah theih loh thu uar takin a sawi a. A thusawi angin bill pawh passed a ni a, kum 1 pawh a liam hmain Cabinet rorel angin Mizoram State University chu Lungleiah suan a nih tur thu a puang leh lawi a, Cabinet rorel anga sawn a nih thu a sawi hnu daihah Cabinet in By Circulation-in an passed leh hnuhnawh tih document atangin finfiah a ni thung a ni an ti a, tum hnih chiang taka Mizoram mipuite a bum avangin a ban an phut tih an sawi a ni.

Minister Dr. Vanlalhlana chu a Dept. chanpualte hneh lo an puhin MNF Thalai te chuan Taxation Dept leh 1&PR Dept te chu laksak a lo ni tawh a. ICT Dept phei chu a bo ta emaw tih mai turin a awm mek a. Kumin Feb ni 26 khan Dr Vanlalhlana chuan ama Office-ah Official te ko khawmin kum 2026 2027 Academic Session tan hun atan March 23 March an ruat a, State khat ve riang ruang, thawh phut lu hai nei niawma thla khat em pawh inbuatsaihna emaw chawhlhawl emaw awm miah loa Sikul kalendar an siam chuan Zoram nu leh pa a ti buai em em a ni an ti a ni.

ZPM Gen Hqr chuan MNF Thalai te hi thuchhuah siama chhangin, Higher & Technical Education Department chuan PM-USHA hnuai hna thawh tur dan angin Open Tender a chhuah a, a chhanna enfiah a nih lain Tender chhangtu Contractor te atangin 'complaint' a awm a. 'Complaint' chu Committee on Petitions ah thehluh niin anni hian an chhuichiang a ni an ti a,

MNF Party chuan Dr. Vanlalhlana tihhniam tumin hma an la nasa ni a sawiin a Department chan thenkhat Minister dang hnena pek chungchang pawh amahin chak leh tha zawka department a enkawl theih nan ama ngen anga lak thenesak zawk a ni a, Chief Minister pawhin budget session kal mekah hian fiah takin a lo sawi vek tawh zawk a ni, an ti.

Zirna Sikul kal hunbi sawn chungchang pawh Mizoram Education Reforms Commission (MERC) te rawtna zulzui zela enho a ni a, tunah hian ram leh hnamin a thatpui ber tur thlir chungin tihpuitlin tum a ni ta chauh a ni, an ti.

<><><>

## **MSU**

Mizo Students Union MSU chuan Staff Selection Commission (SSC) in kum 2024 a Border Security Force (BSF) hnuai Constable General Duty tur lakna exam an buatsaih ah, Mizoram state quota a mi 10 lak zinga mi 8 chu Mizo ni lo leh Mizoram mi ni lo an nih thu a sawi.

Vawiin khan Aizawl Press Club-ah thuthar thehdarhtute kawmin MSU President B. Lalkhawngaiha chuan a, heng mi pa 8 te hian DC Aizawl leh DC Mamit atanga lakchhuah ni awm tak Residential Certificate an nei vek a, amaherawh finfiah tura tih a nih hnuah DC ten chhangletin Residential Certificate hi a lem a nih thu an hriattir a, heti chung hian heng mite hian January ni 10, 2025-a training an zawm chu an chhonzawm zel tho a, January ni 24, 2026 khan training chu zovin, Jammu leh Kashmir lamah post vek an ni a ti.

Heng mite hian certificate lem chiang tak hmanga Mizoram quota an lo luah ve ringawt chu pawh an ti a, chhui chian a nih theih nan leh heng mite hi hremna pek ngei an nih theih nan thuneituten hma la thuai se kn duh hle a ni a ti bawk a, FIR an

thehluh tur thu sawi telin Mizoram chauha thehluh tur thu a sawi bawk.  
Regional Office Guwahati ah te an thehluh tur thu a sawi bawk.

<><><>

## **SESSION DEMAND**

Vawiin khan Assembly session-ah minister pahnih Pu C Lalsawivunga leh Dr Vanlalhlante department chana demand-te sawiho a ni.

Pu C Lalsawivunga department enkawl pali - Art & Culture department tana demand cheng vbc 15.50 te, District Council & Minority Affairs department tana demand cheng vbc 689 point 17 te, Horticulture department tana demand cheng vbc 126 point 62 leh AH & Vety department tana demand cheng vbc 78 point 21 te pawm a ni a; Pu C Lalsawivunga department enkawl palite demand hi a vaiin cheng vbc 910 point 50 a ni.

Dr Vanlalhlana department enkawl pathum tan demand cheng vbc 2,244 point 12 pawm a ni bawk a; - School Education department tana demand cheng vbc 1919 point 25, Higher & Technical Education department tana demand cheng vbc 319 point 10 leh Information & Communication Technology department tana demand cheng vbc 5 point 77 te a ni.

<><><>

## **PM SHRI**

Central Sorkar-in State leh UT-a Prime Minister School for Rising India (PM SHRI) School te tlawh chhuak tura ruahmanna a siam angin Central Nodal Officer, Ministry of Rural Development Jt Secy Pu Lalchhandaman Serchhip District hnuuia a PM SHRI School te a tlawh.

Pu Lal Chhandama chuan PM SHRI Govt Buangpui Primary School, PM SHRI Govt Khawlailung Primary School-II, PM SHRI Jawahar Navodaya Vidyalaya, Thenzawl, Serchhip District chu a tlawh a. PM SHRI School atana hmalakna awm zawng zawng te a enfiah a, Zirtirtute kawm nghal bawk.

Lalchhandama hian vawiin tlai vek khan DC Serchhip chu meeting a neih pui a, Serchhip District chhunga PM SHRI School te hmasawn zel na tur a sawi pui bawk.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## **PM**

India leh Finland chuan vawiin khan inremna thuthlung engemawzat an ziak a. Heng zingah hian Environment lama thawhdunna te, mipui pemkualna leh chetvelnaa thawhdunnate leh Statistics lamte a tel. Prime Minister Narendra Modia leh Finland President Alexander Stubb te vawiina New Delhi-a an inbiak hnuah

inremnate hi ziah a ni a. Hruaitu pahnihte hian an thawhdunna hrang hrangte tihchak zel an rel a. Ram pahnih chhehvel bakah khawvel thil thleng meka an ngaih pawimawhte an sawidun bawk a ni.

Thuchhuah intawm an siamah Prime Minister Modia chuan khawvelin dinhmun derthawng leh ralmuang lo tak a paltlang mek a ti a. Ukraine atanga Asia khawthlang lam thlengin indona a thleng mek a ti a. Pu Modia chuan India leh Finland te chuan sipai chakna hmang ringawt chuan harsatna chinfel theih a ni lo tih hi an pawm a ti a. Hei bakah hian European Union nena sumdawanna lama inremna Free Trade agreement an siam thu tarlangin hei hian sumdawanna, sum peipunna leh technology lama India leh Finland thawhdunna a ti thang nasa dawn tih a sawi a ni.

Finland President hian bimin khan ni li cham turin India a lo thleng a ni.

<><><>

## **BIHAR**

Bihar Chief Minister leh JD(U) President Nitish Kumar chuan Rajya Sabha inthlan chuh turin vawiin khan a hming a thehlut. Patna-a Bihar Legislative Assembly Secretary hnenah nomination hi a thehlut a. He hunah hian hruaitu langsar tak tak Union Home Minister Amit Shah, BJP national president Nitin Nabin, leh Bihar Deputy CM pahnih Samrat Chaudhary leh Vijay Sinha ten an tawiawm a. Pu Kumara hian Rajya Sabha inthlan a chuh tur hi a hmain a lo puang tawh a. Hei hian Bihar politics ah nghawng a nei lian hle a. Pu Kumara chuan Bihar Legislature bakah Parliament member nih chu a duhthusam anih thu a sawi a. Bihar mipuite nen an la thawkho chhonzawm zel dawn tih sawiin sawrkar thar pawh a thlawp dawn thu leh a puih reng dawn thu a sawi a ni..

<><><>